

Երեկոյեան դէմ վրացիները նորից փորձեցին գրաւել Սաղախլուն, փոքրիկ խմբերով առաջ անցան, մագլցեցին 2660 բարձունքը: Մեր զրահապատը կրկին գործողութեան դիմեց նրանց դէմ: 2րդ զնդի մէկ գումարտակը գլխ. Ձերգեշտովի հրամանատարութեամբ բռնեց 2702 բարձունքը: Կռիւներ տեղի ունեցան և Կորոլկովի ու Տէր-Նիկողոսեանի ճակատներում: Վերջինում, երկու օրւայ կատաղի գրոհներից յետոյ, վրացիները գրաւեցին Բոլնիս-Պաչէն գիւղը:

Նոյն օրը, երկար ու յամառ սլահանջներից յետոյ, Դրօն, վերջապէս, ստացաւ փոքրիկ օժանդակութիւն. 4րդ և 6րդ զնդերի համար հասան մօտ 600 թարմ զինւորներ: Դրօն մի կողմից յետ էր մղում թշնամու յարձակումները, միւս կողմից պատրաստուում դեկտ. 31-ի վճռական կռիւի համար. երկու կողմերէլ էլ աշխատում էին զինազարդ փայրկեանին իրենց համար նպաստաւոր դիրքեր ապահովել:

Դեկտ. 31-ի առաւօտեան հայկական զօրամասերը դասաւորւած էին հետեւեալ ձևով. աջ թևում կանգնած էր զնդ. Տիմչենկօն 6րդ զնդի 2 գումարտակով (մօտ 1100 սևին) և 6րդ լեռնային մարտկոցի 2 թնդանօթով: Նրա ճակատն էր Գիւնաշթափա լեռ—Քերփիլին մինչև երկաթուղի: Կենտրոնում՝ 2րդ զնդի 3 գումարտակներ (մօտ 600 սևին) գլխ. Յովհաննիսեանի հրամանատարութեամբ և 7րդ լեռնային մարտկոցի երկու թնդանօթ՝ երկաթուղուց մինչև Բարդաձորից ձոճկան տանող ճանապարհը: Ձախ թևի վրա՝ փոխ-զնդ. Կորոլկովը՝ Բարդաձորի ճանապարհից մինչև Օփրեթի ճանապարհը: Նրա մասերը դասաւորւած էին. Գիւլ-Գազիում միլիցիոն գունդը, Բարդաձորում 4րդ զնդի մէկ գումարտակը, 2 գումարտակ խոժոռնիում, 50 ձիաւոր Աղքերփիում: Պահեստը գտնուում էր ձոճկանում՝ 2րդ զնդի 2 գումարտակներ և 7րդ մարտկոցի 2 թնդանօթներ:

Վրացիները դեկտ. 31-ի առաւօտեան Սաղախլուում հաւաքել էին մօտ 3 և կէս հազար կռուղ*), Դամիա—Սաղախլուում 12 թնդանօթ և մօտ 800 հոգի էլ Քասովիւ թրքական շրջանում: Նրանց առաջապահ մասերը, մօտ 2 վաչտ, գրաւում էին 2660 բարձունքը:

Հայկական հրամանատարութեան ծրագիրն էր՝ գրաւել Սաղախլուն և ոչնչացնել զօր. Մազնիկի զօրամասը: Այդ նպատակով տրւել էր հետեւեալ հրամանը.

Աջ թևը, ժամը 2-ին, սկսում է յարձակման, գրաւում 2660 բարձունքը և, եթէ ձախ թևը առաջանայ յաջողութեամբ, Մամայում կապւում նրա հետ: Կենտրոնական զօրամասը՝ զարնում է ճակատից և զբաղեցնում Սաղախլուի թշնամուն: Ձախ թևը շարժւում է կենտրոնի հետ միաժամանակ և գրաւելով Սիոն—Դամիա շրջանը՝ Մամայում միանում է աջ թևին: Այսպիսով թշնամին առնւելու էր օղակի մէջ և ջախջախւելու:

*) Զօր. Մագնիկի յետագայ յայտարարութիւնների համաձայն, վրացիները ամբողջ հայկական ճակատի վրա ունէին 8,000 կռուղ: